



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

Anr.67/2025

PANELI ZGJEDHOR PËR ANKESA DHE PARASHTRESA (PZAP), në panelin e përbërë nga gjyqtarët: Arsim Hamzaj - kryesues, Kymete Kicaj dhe Skender Çoçaj - anëtarë, duke vendosur përkitazi me ankesën e subjektit politik Lëvizja Vetëvendosje (LVV), me seli në Prishtinë, paraqitur kundër subjektit politik Lidhja Demokratike e Kosovës (LDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore, për Zgjedhjet e Përgjithshme për Kuvendin e Republikës së Kosovës që do të mbahen më datë 09.02.2025, në seancën e panelit të mbajtur me datë 20.01.2025, mori këtë:

VE N D I M

Refuzohet si e pabazuar ankesa Anr.67/2025 e datës 18.01.2025, parashtruar nga Subjekti Politik Lëvizja Vetëvendosje (LVV), me seli në Prishtinë, paraqitur kundër Subjektit Politik Lidhja Demokratike e Kosovës (LDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore, për Zgjedhjet e Përgjithshme për Kuvendin e Republikës së Kosovës që do të mbahen më datë 09.02.2025.

A r s y e t i m

Me datën 18.01.2025 PZAP-i, ka pranuar një ankesë nga subjekti politik Lëvizja Vetëvendosje (LVV) dega në Prishtinë, në të cilën pretendohet se kandidati për deputet nga radhët e Lidhjes Demokratike të Kosovës - LDK, Sokol Haliti, me datë 17 janar 2025, rreth orës 15:00, ka mbajtur tubim me nxënës dhe prindër në ambientet e Shkollës Filllore "Halil Alidema" në Viti, Pozheran të Vitisë.

Më tutje në parashtruesi i ankesës thekson se me këtë veprim, janë bërë dy shkelje nga neni 36 të Ligjit Nr.08/L-228 për Zgjedhjet e Përgjithshme në Kosovë si dhe neni 5 paragrafit 3 të Rregullores Zgjedhore nr. 07/2024 për Fushatën e Zgjedhjeve, Monitorimin e Fushatës së Zgjedhjeve dhe Deklarimin Financiar.

Sipas parashtruesit të ankesës, kandidati në fjalë dhe subjekti politik LDK kanë cenuar rëndë dispozitat përkatëse ligjore, andaj duke u mbështetur në bazën ligjore dhe argumentet e lartcekura, kërkojmë që masa e sanksionit të vendoset në përputhje me legjislacionin në fuqi.

Si provë parashtruesi i ankesës, ka bashkangjitur postimin në facebook, fotografitë dhe CD bashkëngjitur <https://www.facebook.com/reel/588767583945798>.

Më datë 19.01.2025, PZAP-i, e njoftoi subjektin politik Lidhja Demokratike e Kosovës (LDK), për ankesën e paraqitur kundër tyre, duke i dërguar kërkesë për përgjigje deri me datë 20.01.2025 në ora 10:00.

Në përgjigjen në ankesë të datës 19.01.2025, të subjektit politik Lidhja Demokratike e Kosovës LDK, lidhur me pretendimet se kandidati për deputet nga radhët e Lidhjes Demokratike të Kosovës - LDK, Sokol Haliti, ka mbajtur tubim me nxënës dhe prindër në ambientet e Shkollës Filllore "Halil Alidema" në Viti, Pozheran të Vitisë, ka theksuar se nuk qëndron, sepse i përmenduri në ankesë z.Sokol Haliti mban edhe post ekzekutiv, pra është kryetar i Komunës së Vitisë dhe ka përgjegjësi para qytetarëve të Vitisë.

Më tutje në përgjigje në ankesë theksohet se z. Haliti në cilësi të kryetarit të komunës ka edhe obligime të tij të përditshme për mbarëvajtje të punëve dhe detyrave të punës në komunën e Vitisë dhe në rastin konkret ka qenë i organizuar përurimi dhe hapja e SHFMU "Halil Alidema" në Viti, e cila lidhje nuk ka pas me fushatën zgjedhore e as thirrjet për votim, e asgjë tjetër lidhur me tubim politik, por me funksionin që z. Haliti e ushtron çdo ditë e që është shërbimi ndaj qytetarëve, në rastin konkret ka rastis përurimi i një shkolle, e ka mund të jetë edhe përurimi i ndonjë rruge, qendre shëndetësore, terreni sportive e të tjera, pra janë punë dhe detyra të punës kryekëput të lidhura me komunën e Vitisë, as me subjektin politik, as me zgjedhje e as me kandidaturën e tij. Në këtë event nuk ka as material zgjedhore as thirrje për votim të subjektit politik, prandaj një pretendim i tillë është edhe abuzim me të drejtën e ankesës nga ana e LVV, andaj kërkojmë nga PZAP që t'i tërheq vërejtjen subjektit politik LVV që mos të abuzoj me një të drejtë të tillë ose përkundrazi nëse vazhdohet kështu që të animohet për gjithçka edhe të dënohet e njëjta.

Tutje në përgjigje në ankesë është theksohet, për të dëshmuar rolin e tij si kryetar i Komunës së Vitisë po ua bashkëngjisim edhe provën. Për më tepër kryetari i Komunës së Vitisë orarin e punës duhet ta respektoj, madje orari i tij është 24/7 në shërbim të qytetarëve, madje në videon e bashkëngjitur si provë nga LVV nuk dëshmohet e as nuk argumentohet diçka, sepse e njëjta zgjat 27 sekonda e shihet gëzimi i prindërve, mësimmhënësve e nxënësve për hapjen e një shkolle të re, çerdhe të dijes e edukimit të tyre dhe fare nuk ka të bëjë me fushatë zgjedhore apo thirrje për votim, si dhe në përgjigje në ankesë është theksuar se konsiderojmë se një veprim i tillë, pra përurimi dhe hapja e një shkolle fillore është krejtësisht në pajtim me LZP dhe rregulloret zgjedhore, sepse nuk kemi thirrje për votim, nuk kemi materiale zgjedhore aty si dhe prova dëshmon qartë për pozitën që mbajnë të njëjtit, e për të cilën ka përgjegjësi para qytetarëve të Vitisë.

Parashtruesi i përgjigjes në ankesë kërkon që sikurse për rastet A.nr.45 dhe 47/2025 të vendoset njësoj edhe për këtë rast, sepse është identik vetëm se dallon organizimi dhe vendi kuptohet dhe duke marrë parasysh ato që u ceken më lartë kërkojmë nga PZAP që të marrë vendim meritore për rastin në fjalë dhe duke u bazuar në krejt ato që u thanë, ankesa e subjektit LVV të refuzohet.

Paneli, pasi që shqyrtoj dhe vlerësoi ankesën gjeti se:

Ankesa është e pabazuar

Paneli me rastin e shikimit të shkresave të lëndës, vlerësoi se ankesa është e pabazuar pasi që nga fotografitë dhe nga video incizimi të cilat paraqitësi i ka bashkangjitur si dëshmi

ankesave, nuk mund të vërtetohet se nga ana e Subjektit Politik LDK, është bërë shkelje e nenit 36 paragrafi 1 i Ligjit NR.08/L-228, për Zgjedhjet e Përgjithshme në Republikën e Kosovës, ku parashihet se *“personi i cili mban pozitë publike i zgjedhur apo i caktuar nuk mund të përdorë atë zyre apo ndonjë nga pasurit e saj me qëllim të përfitimit të votave. Asnjë nga burimet e asnjë institucioni të administratës publike qoftë të nivelit qendror ose lokal ose edhe ndonjë ndërmarrje në zotërim ose të kontrolluar nga autoritetet qendrore ose lokale nuk mund të shfrytëzohet ose të futen në mbështetje të ndonjë subjekti politik në zgjedhje”*

Nga fotografitë dhe video-inçizimi të cilat gjenden në shkresat e lëndës, vërehet se është realizuar një tubim nga ana e Komunës së Vitisë, në të cilin është organizuar përrurimi dhe hapja e SHFMU "Halil Alidema", në Viti, në të cilin kanë qenë prezent, mësimdhënës, nxënës dhe prindër në ambientet e Shkollës Filllore "Halil Alidema", në Pozheran të Vitisë dhe z.Sokol Haliti mban edhe post ekzekutiv, pra është kryetar i Komunës së Vitisë. Andaj nga fotografitë dhe video-inçizimi nuk është i argumentuar në asnjë moment në mënyrë të qartë dhe bindëse se në këtë përrurim është mbajtur për të promovuar Subjektin Politik LDK apo të kandidatëve të saj, ashtu siç pretendohet nga pala ankuese, pasi që nga të gjitha fotografitë e dorëzuara si provë nuk mund të vërehet asnjë shenjë – simbole apo material zgjedhor i subjektit në fjalë.

Andaj duke u mbështetur në nenin 117.3 të LZP-së ku përcaktohet se: *“vendosja për ankesat nga PZAP-ja mbështetet në dëshmi të qarta dhe bindëse”*, Paneli vlerësoj se pretendimet e tilla janë të pa qëndrueshme dhe si të tilla i refuzoj, për faktin se nga veprimet e përshkruara në ankesa dhe nga provat e ofruara si dëshmi parashtruesi i ankesave nuk ka arritur që të vërtetoj se këto veprime paraqesin shkelje të dispozitave të lartcekura të Rregullës Zgjedhore Nr.07/2024, dhe si të tilla të njëjtat i refuzoi si të pabazuara.

Nga arsyet e theksuar më lartë duke bazuar nenin 117 paragrafi 3, neni 118 paragrafi 1 të LZP-së, paneli vendosi si në dispozitiv të këtij vendimi.

Paneli Zgjedhor për Ankesa dhe Parashtrësia
Anr.67/2025 më datën 20.01.2025

Kryesues i Panelit
Arsim Hamzaj



Këshilla Juridike: Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimit të këtij vendimi.